

TORITENY - ALAHADY faha-29 TSOTRA - TAONA D



Andriamanitra indray va no tsy hanome rariny ny olom-pinidiny izay mitaraina aminy andro aman'alina, ary tsy halaky hamonjy azy ?

Ry Kristianina havana tamin'ny Alahady lasa teo isika nibanjina manokana ny finoana izay nahitantsika taratra ny nanjo an'i Naàmana ilay Jeneraly Sirianina raha niditra tao amin'ny ranon'ny joridany izy ka nadio ary afaka ny aretin-kodiny, niverina tamin'ny toe-batany teo

Vakiteny I : Eks. 17: 8-13

Salamo : Sal. 120

Vakiteny II : 2 Tim. 3, 14 — 4, 2

Evanjely : Lk. 18, 1-8

aloha izy. Nahitantsika koa ireo marary hoditra folo lahy izay nositrarin'i Jesoa sy nodioviny saingy anankiray ihany no nahatsiaro nankasitraka an'Andriamanitra. Ho famintinana izany rehetra izany dia nilaza isika fa mitaky faharetana ny finoana velona, raha mitoetra amin'ny finoana isika ka manompo anatin'ny faharetana

manatanteraka ny sitrak'Andriamanitra dia ho tsara ny fiainantsika. Zary EOY Misionera. Ny famenoana sajoa sôta, siny enina no fanehoantsika ny fivelomantsika ny finoana. Izany indrindra no ataontsika amin'izao fanatanterahantsika izao Sinaody faha-7 fijanonana faha-3 (3eme session) izao izay handalinantsika ny fiainantsika andavanandro, ny fiaraha-monina mba ho vontom-pinoana ka hahatonga antsika ho EOY mifampitsimbina, mifanasoa, mikatsaka soa iombonana.

Araka ny voalazantsika ihany koa amin'izao volana oktobra volana voatokana ho an'ny misiona izao dia anirahana antsika hibanjina kokoa ny maha-misionera antsika kristianina zanak'Andriamanitra tamin'ny alalan'ny batemy noraisintsika. « Vita batemy aho ka irahina », misionera ka mandinika manokana ny finoana mahatonga antsika ho tena vavolombelona. Anatin'ny volana oktobra koa no hanaovantsika ny raozery hibanjinantsika sy handinihantsika miaraka amin'i Masina Maria ny misterin'ny famonjena antsika. Ny

hafatry ny Papa nanentana antsika amin'ny vavaka Raozery mba hanjaka ny fiadanana sy fandriam-pahalemana eran-tany amin'izao fotoan'ny krizy maro lafy izao ary eto Madagasikara indrisy miaina izany krizy izany. Ka noho izany tsara raha manao vavaka totoafo miainga avy amin'ny fianakaviana Eglizy kely. Mitaky Finoana velona izany rehetra izany fa tsy finoana resaka sentosento fotsiny. Finoana velona entina miatrika ny fiainana. Mila mahay mampitraotra ny finoana sy ny fiainana andavanandro isika mba ho EOY hanorina Eglizy Tranobe lombonana izay mitady ho tena robaka. Zary misionera eo anivon'ny mpiara-belona amintsika. Io no tanjon'izao Sinaody faha-7 iarahantsika manao izao ary mandritra ny fanatanterahana ny Fijanonana faha-3 no ankalazantsika ny faha-70 taonan'ny diosezy sy anaovantsika ny Fivahinianana Masina amin'izao taon-jobily ka sady fanehoana finoana no fanovozana azy mba hitombo hatrany mameno ny sajoa sôta. Mb Terezin'i Jesoa zazakely mpiaro ny misiona no italahantsika handrotsaka ny « orandraozy » ho antsika amin'izao Taon-Jobily izao.

Amin'izao Alahady faha-29 mandavantaona izao, asain'ireo vakiteny telo isika handinika bebe kokoa ny vavaka sy ny anjara toeran'ny vavaka, ny antony tsy maintsy hivavahantsika sy ny vokatry ny vavaka eo amin'ny fiainantsika. Io dia kriterana fototra mikasika ny finoana. Anisan'ny sajoa voalohany tsy maintsy fenoina ny « mivavaka » amin'izao DIA sady ADY ataontsika hahatonga antsika ho misionera izao. Averimberintsika matetika ny fanontaniana hoe « ahoana ny hahafantarana fa manana finoana velona isika? »

Voalaza fa velona ny finoantsika raha manompo isika ary modely ho antsika i Masina Maria, finoana velona ny finoana raha manana faharetana isika amin'ny fivelomantsika ny finoana. Mbola i Masina Maria ihany koa no modelintsika amin'izany satria teo am-pototry ny hazofijaliana izy niatrika an'i Jesoa zanany nanolotra ny ainy, tsy maintsy manana faharetana isika.

Azo lazaina fa ny vavaka no kriterana fahatelo raha zohintsika ny fandalinam-pinoana miainga amin'ny Vakiteny natolotry ny Eglizy tato ho ato. Ny vavaka kosa no voalohany amin'ny sajoa sôta hoy isika. Ny vavaka no azo lazaina rano, mahalegny mamelona ny tany itsiriran'ny finoana. Ka araka ny haintsika tsara raha tsy misy ny mahalegny, raha ritra ny renirano dia maty ny voly jiaby karaha izegny koa raha tsy misy ny vavaka maty ny finoana. Ny vavaka no hanambarana fa velona ny finoantsika, raha tsy mivavaka isika dia finoana maty ny finoantsika. Io no asain'ny Eglizy hodinihantsika amin'ny alalan'ireo Vakiteny arosany amin'izao Alahady izao.

Hitantsika amin'ny Vakiteny voalohany ny tantaran'i Moizy sy ny vahoaka : rehefa tsy nanandratra ny tanany i Moizy izany hoe tsy mivavaka, dia resy : « *Raha nasandratr'i Môizy ny tanany dia i Israely no nahery; fa raha nitambotsotra kosa ny tanany, i Amaleka no nahomby.* »

Raha tsy mivavaka isika dia tsy mamokatra ny fiainantsika, fampianarana velona ho antsika ny vakiteny voalohany. Izany no mahatonga antsika handinika ny hoe inona ny anjara

toeran'ny vavaka eo amin'ny fiainantsika ?

Matetika isika mitodika amin'Andriamanitra rehefa mitalaho, vavaka izany nefa tsarovy fa na dia marina aza fa **ny** fitalahoana ny fahasoavan'Andriamanitra ny vavaka ary avy aminy **ny** no hananantsika ny hery rehetra entintsika mamakivaky ny fiainana, na dia eo koa ireo fijaliana dia fantaro ry Kristianina havana fa tian'Andriamanitra hanana fo amam-panahy misy azy isika izany hoe rehefa mivavaka isika dia mieritreritra fa hahazo ny fahasoavana. Marina izany fa ny tena tadiavin'Andriamanitra rehefa mivavaka isika dia raisiny an-tànana ny fiainantsika ka zary fitaovana ho entiny hanitarany ny fanjakany isika. Tian'Andriamanitra ny fo amam-panahintsika ho azy tanteraka, amin'izay afaka mitondra ny famindram-pony amin'ny alalantsika eo amin'ny mpiara-belona lzy, izany no vavaka finoana velona. Ampiasain'Andriamanitra isika noho ny vavaka ataontsika, anambarany ny fitiavany. Miasa ao amintsika Andriamanitra ka afaka manova ny fiainantsika satria mitondra ny fitiavan'Andriamanitra eo amin'ny mpiara-belona isika. Tena mitady antsika Andriamanitra ary mety tsy ampoizintsika izany. Miombona amintsika amin'ny alalan'ny vavaka Andriamanitra ary raha ao amintsika lzy dia miova ny fiainantsika, entanin'ny fanahin'Andriamanitra isika ka zary fitaovana ampiasainy eo amin'ny manodidina antsika.

Izany no ambaran'i Md Paoly amin'ny vakiteny faharoa, ho lavorary ny olon'Andriamanitra ary vonona amin'ny asa soa rehetra. Raha mandinika tokoa isika dia manampy antsika hanana faharetana ny vavaka ka mivelona ny maha-zanak'Andriamanitra isika. Voalazantsika matetika fa raha manao ny asan'Andriamanitra isika dia Andriamanitra manao ny asantsika ary izany no vokatry ny finoana velona sy maha-misionera antsika satria vavolombelon'Andriamanitra isika ka zary fanilo sy fahazavana eo amin'ny manodidina antsika. Aoka isika hanaiky handray an'Andriamanitra eo amin'ny fiainantsika.

Inona àry ny hatao hahaizantsika handray an'Andriamanitra ?

Araky ny voalazan'i Jesoa amin'ny Evanjely dia ny faharetana. Raha miresaka fivavahana isika dia faharetana no toetra takin'ny vavaka mba ho lasa tabernakla tahaka an'i Masina Maria izay banjinintsika manokana amin'izao volan'ny raozery izao. Raha tsy manana faharetana isika dia tsy handaitra amin'ny fiainantsika ny vavaka.

Efa nambarantsika tamin'ny vakiteny voalohany fa raha tsy nivavaka i Moizy dia resy ny vahoaka, toy izany koa raha tsy mivavaka isika dia ho maro ny fakam-panahy sy ny zavatra mifamahofaho amin'ny fiainantsika. Lavo amin'ny fakam-panahy isika ka lasa tsy zarizary ny fiainantsika izany hoe tsy ao anatin'ny fivavahana ka noho izany ilaina sy mila faharetana ny vavaka.

Inona ny vokatry andrasantsika raha mivavaka isika ? Voalaza ao amin'ny Evanjely, « *lazaiko aminareo fa omeny rariny haingana izy ireo kanefa rehefa tonga ny zanak'olona moa hahita finoana eto an-tany izy* » ? Aoka ary hatoky isika fa raha manana faharetana amin'ny vavaka isika dia hahazo vokatsoa satria tsy inona fa Andriamanitra eo amin'ny fiainantsika. Hiezaka

àry isika hameno ny sajoa voalohany dia ny : « mivavaka »

Hitantsika amin'ny vakiteny faharoa ampianarin'i Md Paoly an'i Timote ka ampianarina amintsika ihany koa « *Eo anatrehan'Andriamanitra sy i Kristy Jesoa, izay hitsara ny velona sy ny maty, ary noho ny andro hahatongavany sy hanjakany: Mitoria ny teny, ary mahareta amin'izany na amin'ny fotoana na tsy amin'ny fotoana: manitsia, mananara, mamporisaha, amim-pandefarana sy amim-pahaizana mandrakariva* ».

Izany no anjaran'olon'Andriamanitra, ny olona misionera, io no anjaram-piainantsika hahitantsika fahasoavana amin'ny alalan'ny vavaka ary am-paharetana no hanaovantsika azy na dia misy ny manenjika antsika aza, aoka hatoky isika fa ao amintsika Andriamanitra.

Tadidio ireny hafatra nampianarin'Andriamanitra antsika ireny, aoka isika ho vonona hampirisika, hananatra, hanitsy am-pandefarana ireo manodidina antsika.

Ry Kristianina hava-malala, aoka isika hatoky mandrakariva ny famindram-pon'Andriamanitra fa izay miombona amin'ny famindram-pon'Andriamanitra dia miova ny fiainany ka hanana ny fiainana misy an'Andriamanitra isika, misy fifankatiavana sy fahamarinana, mampanjaka ny rariny sy ny hitsiny sy mikatsaka ny soa iombonana hatrany. Izany no antenaintsika amin'ny famakivakiansika ny oktobra volana manokana ho an'ny misiona sy mampiditra antsika amin'ny fanatanterahantsika ny Sinaody faha-7 Fijanonana faha-3 sy fankalazana ny faha-70 taonan'ny diosezy ary hanaovantsika ny Fivahinianana Masina amin'izao taon-jobily izao. Velona ny finoantsika raha manompo, raha manana faharetana isika, raha vonton'ny fivavahana tokoa ny fiainantsika ka hahatonga antsika ho tena Eglizy Olona Velona mampanjaka ny rariny sy ny hitsiny ary dia manorina Eglizy Tranobe lombonana amin'ny alalan'ny fifampitsimbina, ny fifanasoavana, ny fikatsahana ny soa iombonana ka ho tena génération mpanorina tokoa isika, ho Mpivahinin'ny Fanantenana mamafy fiadanana, hafaliana, fihavanana sady kristianina no malagasy amin'ireo mpiara-belona amintsika.

Mitodika amina izahay Masina Maria Mpanjakavavin'ny Rozery sady Mpanjakavavin'ny Misiona ento am-bavaka izao fanatanterahana ny Sinaody izao. Mivavahà ho an'i Madagasikara. Md Josefa mivavahà ho an'ny fianakaviana izay tena maro ny mijaly vokatr'izao krizy izao. Amen

Mompera Arseveka Mgr Benjamin Ramaroson